



Broj: 06-04-51929-30/24  
Sarajevo, 10.12.2024.godine

## **SKUPŠTINA KANTONA SARAJEVO** **-OVDJE-**

**Predmet:** Odgovor na zastupničko pitanje zastupnika Dević Mahira, dostavlja se

Zastupnik Mahir Dević je na 17. Radnoj sjednici Skupštine Kantona Sarajevo, održanoj dana 26.11.2024. godine, u okviru tačke Dnevnog reda "Poslanička/zastupnička pitanja, inicijative i odgovori" postavio zastupničko pitanje koja glasi:

"Tražim od Ministarstva za boračka pitanja Kantona Sarajevo da mi dostavi podatke korisnika jednokratne novčane pomoći sa područja Općine Ilijaš, po imenima i prezimenima, u 2024. godini uključujući i novembar tekuće godine."

Na postavljeno zastupničko pitanje dajemo slijedeći

### **ODGOVOR**

Odredbama Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", br. 31/22 i 8/24) definisana su dopunska prava i uvjeti za ostvarivanje prava. Članom 56. Zakona o dopunskim pravima boraca-branitelja Bosne i Hercegovine propisano je pravo na dodjelu jednokratne novčane pomoći, da pravo na dodjelu jednokratne novčane pomoći mogu ostvariti članovi porodica šehida, članovi porodica poginulih, umrlih i nestalih branioca, ratni vojni invalidi i članovi njihovih porodica, dobitnici ratnih priznanja i odlikovanja i članovi porodica poginulih, umrlih i nestalih dobitnika ratnog priznanja i odlikovanja, branioci, demobiliziranih branioci, dobrovoljci, organizatori otpora, veterani i ratni vojni zarobljenici, kao lica zaslužnih u odbrambeno – oslobodilačkom ratu sa područja Kantona Sarajevo, kao i mirnodopski vojni invalidi u vidu dodjele novčanih sredstava za rješavanje socijalnih potreba (zadovoljavanje osnovnih životnih potreba, pomoć teško oboljelim, nabavka lijekova, grijanje, poplave, požari i sl.). Pravo na dodjelu novčanih sredstava mogu ostvariti i djeca šehida i poginulog branioca kada je u pitanju pomoć teško oboljelim. Također, propisano je da Ministar posebnim pravilnikom uređuje način, uvjete, kriterije, postupak i opravdanost zahtjeva za ostvarivanje ovog prava, spram raspoloživih budžetskih sredstava.

Članom 18. Pravilnika za utvrđivanje prava na dodjelu jednokratne novčane pomoći („Službene novine Kantona Sarajevo“, br. 7/24 i 20/24) uređeno je da se jednokratna novčana pomoć za rješavanje socijalnih potreba, po ukazanoj potrebi može dodjeljivati licima iz člana 1. Zakona o dopunskim pravima boraca-branitelja Bosne i Hercegovine koji se nalaze u stanju socijalne potrebe, teže bolesti, elementarne nepogode, nabavke lijekova, u svrhu grijanja i ostalih slučajeva teških socijalno-ekonomskih situacija koji mogu dovesti do ugrožavanja osnovnih životnih potreba, te da ovo pravo mogu ostvariti i djeca šehida i poginulih branioca, bez obzira na godine života kada je u pitanju pomoć teško oboljelim. Jednokratna novčana pomoć za rješavanje socijalnih potreba se dijeli na tri osnovne grupe i to: teže bolesti, druge socijalne potrebe (zadovoljavanje osnovnih životnih potreba, nabavka lijekova, poplave, požari i sl.) i grijanje. Odredbama člana 19. istog Pravilnika propisano je da Komisija za dodjelu jednokratne novčane pomoći za rješavanje socijalnih potreba, uz saglasnost ministra, donosi prvostepenu zbirnu odluku o dodjeli/odbijanju zahtjeva za jednokratnu novčanu pomoć, a članom 20. stav (10) propisano je da za lica koja ispunjavaju uvjete za dodjelu jednokratne novčane pomoći Ministarstvo donosi zbirnu odluku koja se objavljuje na info-punktu i web stranici Ministarstva.

Iz naprijed navedenog ističemo da ovo Ministarstvo u skladu sa odredbama Uredbe o vrsti i postupku objavljivanja propisa i javnosti rada organa uprave, javnih preduzeća, javnih ustanova i pravnih lica čiji je osnivač Kanton Sarajevo ("Službene novine Kantona Sarajevo", br. 21/19 i 29/24) objavljuje spiskove korisnika koji su ostvarili pravo na jednokratnu novčanu pomoć i javnosti su u svakom momentu dostupni, a nalaze se na Web stranici Ministarstva za boračka pitanja Kantona Sarajevo na meniu: PROPISI – POJEDINAČNI AKTI MINISTARSTVA.

S poštovanjem,

Dostaviti:

- Predsjedavajućem Skupštine Kantona Sarajevo,
- Zamjenici predsjedavajućeg Skupštine Kantona Sarajevo x3,
- Službi za Skupštinske poslove Kantona Sarajevo,
- Stručnoj službi Vlade Kantona Sarajevo,
- A/a.

